

惠安縣志卷之一

邑人淨峯張岳維喬

閩越之墟實維星紀井絡支分南循海澨爰考圖經
參度形勢剖割晉江縣道攸制履至都圖山川險易
翼翼戢戢式相承比匪維地征維民作乂志建置形
勝封域圖里險塞目凡五
建置

閩自漢武遷其民於江淮之間其遺民亡不從遷者
聚為冶縣建安初始置候官建安南平漢興等五縣
吳末安三年以建安為郡增置建平東平將樂昭武

惠安志卷一

李

東安并舊縣凡九晉大康二年又以候官東安為晉
安郡梁天監中又折晉安置南安郡至隋改晉安為
泉州治三山廢建安南安二郡以屬之唐嗣聖十六
年復折泉州之南安莆田龍溪置武榮州治南安景
雲二年改武榮為泉州舊泉州為閩州開元八年折
南安置晉江縣泉州徙治焉宋太平興國六年始折
晉江東鄉十六里置惠安縣

論曰攷吾邑建置始末如此三國時屬候官晉屬晉
安梁隋及唐屬南安開元以後屬晉江至宋乃自為
縣也然今縣北龍窟嶺下有古縣遺址市廛私諱與

今治所頗相類豈始基於此而後乃遷與蓋不可攷矣

形勝

大帽山南馳爲雲峰東平卧龍諸山至螺山端整圓秀而縣治負焉東爲東嶽山其西少北爲蓮華峰蓮華之南爲登科山又南復東折里許有山卷然廻拱縣治曰樓山或曰留山言鎖截風氣去而復留也蓮華登科皆有竒石峭拔峙乎縣治之右而東嶽東麓支山培樓勢若退讓委伏不敢與之抗者昔人多建廟宇及浮屠以壯其勢水出蓮華峰下循螺山西址

經縣治前至樓山之陰鑄以石亭出石亭東流入于民田樓山之外尖峯秀聳曰文筆山復東而北爲靈瑞山逶邐十五餘里至峯崎山當縣治東北凡近邑諸山自西北而東南復東而北者至此而窮青龍橋在其下諸水匯焉北入于海

論曰余行天下見江南諸山由西北昆侖發原至岷山乃拆而東爲楚越諸郡東北至吳淞際海而止江漢水交流其下今以吾邑觀之亦然意天下山川雖細大不侔其脉絡固有同歟古人建都置邑必審擇山川風氣有以也夫

封域

環邑之疆竟西北跨山東南皆際海正北曰白水舖距縣四十里其外則仙遊楓亭正南曰北鎮距縣五十里其外則晉江後渚正西曰螃嶼嶺距縣三十五里其外則晉江白洋正東曰小岞距縣四十五里其外則大海西北則東坑寨後達仙遊下安里西南則虎窟山達晉江河市東北則黃崎東南則崇武與小岞俱大海云縱九十里橫八十里

論曰吾邑廣輪之數止是爾然且包山林並原隰杼其中斬長綴短可耕之田不能紓三之一斤鹵者幾半上承會府下引漳潮之衝并日以馳不足也夫不察地利本末猥令豐瘠同科顛顛焉執計簿以取盈爲事不已虧乎

圖里

初置縣時折晉江東北十六里領以三鄉其後復增至二十里慶曆八年乃定爲十八里仍三鄉領之西南曰崇武鄉領太康守節禮興民安長安東南曰崇善鄉領平康歸化祥符溫陵安仁同信尊賢延壽東北曰城山鄉領崇德德音光德待賢民蘇熙寧保甲法行分三十四都置保正副元元貞元年更爲四鄉

曰文質行滿忠恕信義仍十八里三十四都其倚郭者為在坊至正末兵起西北數都皆崎嶇山嶺間寇所出沒戶口消耗至我朝正統間猶未完復都圖名數雖仍其舊亦不能無合析變更矣

縣東都凡十宋文質鄉

一都二都宋平康里

五都宋崇德里

二十八都二十九都宋祥符里

三十都三十一都宋延壽里

三十二都宋溫陵里

— 八惠安志卷一

四

陳刊

三十三都三十四都上下宋安仁里

縣南都凡九宋行滿鄉

十九都宋民安里

二十二二十一都宋長安里

二十二都二十三都二十四都宋太康里

二十五都二十六都二十七都宋守節里

縣北都凡九宋忠恕鄉

六都七都上下八都上下宋德音里

九都十都宋光德里

十一都宋待賢里

十二三併都宋民蘇里

縣西都凡七宋信義鄉

三四都宋歸化里

十四五都宋尊賢里十六七都宋同信里今併爲一十八都宋禮興里

論曰周官井牧書自四井爲邑遞登其四以至於都故都無殊縣縣無殊甸甸無殊丘丘無殊井是故賦平而政一後世都圖倣是設也然非計丘畝以均其制多寡盈乏相懸絕大者自分爲二矣小者至不能都或比其二三乃得與他都齒調賦經用胥吏舞手爲奸民仰首受成莫有知所由然者故經界不行圖里不均由今之道而欲以至於治難矣

險塞

宋以前遠矣元末變起莆中始寨白水之南其後寇遁入海自縣南登岸燬官府廬舍驅其民北抵莆城以爭又數年乃定 國朝永樂間有島夷之患始壘沿海五城重者置屯兵小者亦設民戍正統末沙汀蘄作永春安溪相挺而起始發民卒備虎窟是後聞西南警報輒備虎窟事寧撤備故述往事列其制變衛民之略俾來者得攷觀焉

白水寨在白水舖之南一名陳同寨

東坑寨在縣西北日曝嶺西五里入仙遊

虎窟寨在縣西南山谷間崇山夾峙狹徑僅通人行
崇武灣瀨窟灣小岞灣黃崎灣峰尾灣以上五灣俱
有城壘控制大海

論曰觀古人審略封疆必先制其阨阨明斥堠其於
折伏狂狡之術可不謂豫哉吾邑山海之道交衝地
小而爲備者多幸時無事與四隣同其安靜一不幸
有援桴馳羽之變寧能晏然而起乎故曰小國無罪
恃實其罪可不戒哉可不戒哉